

Sedmična kolumna visokog predstavnika za BiH Christiana Schwarz- Schillinga: "Mostar je važan"

Svi smo svjesni činjenice da Mostar predstavlja snažan simbol, i to ne samo unutar granica Bosne i Hercegovine. To je grad čiji je značaj prepoznat širom svijeta. Stari most predstavlja bezvremensku istinu o mogućnosti mirnog i prosperitetnog suživota između različitih zajednica.

Svi smo isto tako svjesni činjenice da su se posljednjih godina u Mostaru mogle vidjeti «u malom» mnoge od stvari koje postoje u Bosni i Hercegovini, a koje su za žaljenje. U protekloj deceniji, ovaj grad je uporno, na obeshrabrujući način, pokazivao kako građani mogu biti dovedeni u mizerno stanje kada njihovi politički predstavnici konstruktivan dijalog zamijene političkim prepirkama i odaberu nepopustljivost umjesto rješavanja problema.

Naravno, ovo nije isključivo problem Mostara. Postoje općine u cijeloj zemlji gdje su čelni ljudi izgubili i vrijeme i sredstva na praznu priču i stalne nesporazume, umjesto da život učine boljim za građane za koje tvrde da ih predstavljaju. Ali trenutne teškoće u kojima se nalaze građani Mostara jasno i u velikoj mjeri otkrivaju nedostatke političkog vodstva ovog grada.

Gradska uprava ne funkcioniра jer duže od decenije ima previše uposlenika i slabo je organizirana; javna komunalna preduzeća su neefikasna; a i druge institucije koje treba da pružaju usluge građanima su nezadovoljavajuće.

Pojedini čelnici Mostara, uključujući gradonačelnika Ljubu Bešlića i predsjednika Gradskog vijeća Murata Ćorića, su

pokušali da riješe ove probleme, ali većina gradskih političara to nije uradila. Dvije stranke koje u Mostaru dijele vlast u posljednjih deset godina, SDA i HDZ, su slabo služile građanima.

Upravni odbor Vijeća za implementaciju mira je 23. juna, nakon sastanka održanog u Sarajevu, konstatirao da napredak ostvaren ka ujedinjenju Mostara tokom dvije godine od donošenja Gradskog statuta nije zadovoljavajući. Vijeće za implementaciju mira je od mene zatražilo da, ukoliko to bude potrebno, preduzmem mjere kako bi se ovaj proces pokrenuo naprijed. Od tada sam pokušao da posredujem u iznalaženju rješenja za neke od ključnih problema koji su – potpuno nepotrebno- otežali život građana Mostara.

Prije nekoliko sedmica jasno sam stavio do znanja raznim čelnicima Mostara da bez daljnjeg odlaganja moraju početi provoditi rješenja u vezi sa problemima javnih komunalnih preduzeća, državne službe, HTV-a i drugih lokalnih institucija.

Tokom ljeta, od mostarskih političara sam dobio obećanja da će poduzeti konstruktivne i pragmatične mjere, i određeni napredak je ostvaren na ustanovljavanju metoda i vremenskog okvira za smanjivanje viška radnika kao i na popunjavanju pozicija u državnoj službi. Međutim, u pogledu ostalih neriješenih pitanja ništa nije urađeno.

To je neprihvatljivo. Rješavanje ovih pitanja se ne može neprestano odgađati. Političari moraju shvatiti da greške ne prave u vakuumu. Njihov neuspjeh pogađa druge ljude. U slučaju Mostara, njihov neuspjeh pogađa desetine hiljada građana.

Političari u Mostaru su imali više od dvije godine da riješe ova pitanja. Nisu uspjeli. Ne preostaje mi ništa drugo već da poduzimanjem direktnih mjera nadoknadim te neuspjehe. Zato ću kasnije danas najaviti mjere namijenjene rješavanju postojećeg zastoja, kada su u pitanju javna komunalna preduzeća, HTV, i

druge institucije u Mostaru.

Mostar je važan – Mostar je najvažniji građanima koji u njemu žive, ali je isto tako važan i građanima u ostatku Bosne i Hercegovine, kao i van granica ove zemlje. Ovo je grad koji *može* napredovati; ovo je grad koji iznova *može* biti dom energične, urbane zajednice koja nikog ne isključuje. Svrha mjera koje se spremam poduzeti je prevazilaženje prepreka, kako bi se ta mogućnost pretvorila u stvarnost.

Christian Schwarz-Schilling je visoki predstavnik međunarodne zajednice i specijalni predstavnik Evropske unije u Bosni i Hercegovini.